

# L'urs da la Val d'Alvra ha stuì laschar la vita

Las accziuns da spaventada han gì nagin effect sin l'urs che è uschia daventà in urs da ristga per il umans

■ (cp/mc) **Stersas saira è l'urs l'urs JJ3 che sa chattava dapi in onn en il territori dal Grischun central vegnì sajettà dals organs da chatscha. L'urs selvadi era daventà ina ristga per la segirezza dals umans.** Sco quai che cusseglier guvernativ *Stefan Engler* ha declerà ier avant las medias tschertgava l'urs problematic sistematicamain nutriment en ils abitadis. Sia tema envers l'uman na eria betg pli gronda, malgrà ch'ins haja instradà repetidamain accziuns da spaventada en ils vitgs. «L'urs è vegnì sajettà en il rom dal concept davart l'urs en Svizra», ha punctuà Engler. Sco quai che il schef da l'Uffizi chantunal da chatscha e pestga *Georg Brosi* ha raquintà saja l'urs JJ3 dà en egl'atun 2007 sco er cunzunt durant las ultimas emnas suenter la sien d'enviern pervi da sias excursiuns tras ils abitadis da las regions da Lai, da la Val d'Alvra e da Savognin. El tschertgava regularmain ses nutriment en recipients ed en containers da rument e n'aveva pli nagina tema dals umans e dals abitadis. «Igl ha dà pliras scuntradas tranter l'uman e l'urs», ha ditg Brosi. Envers ils umans na saja l'urs dentant mai sa cumportà en moda agressiva, ma la ristga d'in accident, nua ch'in uman avess pudì vegnir blessà u schizunt mazzà, eria dentant meina gronda.

## In urs da ristga

Las personas responsablas da la confederaziun e dal chantun n'han vesì naginas pussaivladads pli per anc pudair influenzar il cumportament da l'urs. Tenor il concept davart l'urs en Svizra è el pia daventà in «urs da ristga» che ha stuì vegnir sajettà. Quest concept prevesa ch'in urs duaia vegnir eliminà, sch'el ha pers la tema da l'uman, sch'el sa renda repetida-



ler han tanter auter cusseglier guvernativ Stefan Engler e l'inspectur da chatscha e pestga Georg Brosi motivà la decisiun. KEYSTONE

main en territoris d'abitadi serrads e sche sia tema envers l'uman na daventa betg pli gronda, malgrà ch'el vegn spaventà repetidamain. JJ3 è vegnì sajettà la saira dals 14 d'avrigl 2008 en il territori dal Grischun central.

## Spaventadas senza effect

Sco quai che Georg Brosi ha ditg han las autoritads responsablas empruvà l'atun

2007 sco er la primavera 2008 durant pliras emnas da svegliar la tema da l'urs. En uschenumnadas accziuns da spaventada han ellas sajettà insaquantas giadas sin el cun ballins da gomma e cun petardas ed han empruvà d'al stgatschar cun tut ils meds or dals vitgs. Las spaventadas avevan la finamira da midar il cumportament da JJ3, per ch'el daventia puspè pli spuret e emprendia a guntgir

l'uman ed ils abitadis. Questas mesiras – che han gì lieu l'ultima giada il cumenzament d'avrigl – èn dentant stadas invanas. Las autoritads responsablas partan dal fatg che JJ3 haja surpiglià ses cumportament problematic da sia mamma Jurka. Perquai che Jurka n'ha nagina tema, è ella vegnida pigliada avant intgin temp en Italia. Dapi lura viva ella en in claus. Er ses auters descendents, JJ2

«Lumpaz» (l'emprim urs ch'è immigrà en Svizra suenter passa 100 onns; sparì dapi l'onn 2005) e JJ1 «Bruno» (sajettà l'onn 2006 en Baviera), avevan il medem cumportament problematic. JJ3 è crudà en egl'atun ch'el è cumparì en Svizra. Perquai è el vegnì piglià gia l'avust 2007, nua ch'ins l'ha munì cun in cularin cun emettur.

Avant la decisiun d'eliminar l'urs han gì lieu discurs cun las autoritads talianas. Las autoritads responsablas dad omadus pajais èn vegnids a la conclusiun che quai na saja naginas opziuns da pigliar e da tegnair JJ3 en in claus. Dal punctg da vista da l'etica d'animals èsi problematic da serrar in urs en in claus, pertge ch'el na pudess strusch vegnir tegnì en là conform a la spezia. Consequentamain prevesa il concept davart l'urs en Svizra da sajettar in urs da ristga.

## Il segund urs è discret

En il chantun Grischun – en il territori da l'Engiadina, da la Val Müstair e dal Parc Naziunal – è in segund urs, MJ4, en viadi. Quest urs è spuret e chaschuna mo qua e là in donn. Las experientschas ch'ins fa cun el mussan ch'igl exista tuttavia in spazi da viver per l'urs en Svizra. Il tractament da ruments organics sto dentant vegnir adattà a vista mesauna en regions nua che l'urs è permanentamain preschent. Il chantun vul s'engaschar per l'introducziun da systems da ruments ch'èn segirs cunter l'urs, per che l'urs possa vegnir tegnì davent dals abitadis tant sco pussaivel. «En la relaziun cun urs immigrants stattan las autoritads en in conflict da finamiras tranter «urs – individi» ed «urs – populaziun» ha ditg Engler. Sch'in animal saja dentant ina ristga per l'uman stoppia el vegnir eliminà.